

Q. D. B. V.

DISPUTATIO MEDICA,

DE

VOMICA  
CEREBRI,

QUAM

*in Almâ Eberhardinâ,*

PRÆSIDE

D. RUDOLPHO JACOBO

CAMERARIO,

Facultatis Medicæ Decano

Spectatissimo,

*Publico examini submittit*

ULRICUS ZELLER,

Herrenbergensis.

IN AUDITORIO MEDICO

*Ad diem Septembris*

Anno MDCCXI.

---

TUBINGÆ,

Typis JOHANN-CONRADI REISL.







## Σ. Θ.



N limine resolvendi thematis anatomico-practici non videtur necesse præfari multis, aut tueri rationibus institutum. Quis enim hoc reprobatur, vel nos moratur? Non sanè *Helmontius*, quanquam anatomicis minus videatur æquus. Redarguit quidem tr.

*Ign. act. reg.* §. 32. curiositatem sui temporis superfluum, cum neglectu interim simplicium: Lacescit etiam anatomicam in tr. *Ign. hosp. morb. & hydr.* §. 90. §. 10. vel non tam ipsam, quàm dissectiones cadaverum reprehendit, quòd ad excusandum modò peccata hoc faciant, non ad discendum & proficiendum in arte, contenti hæredibus imminuentem in parte corruptionis notam ostendisse, quâ tanquam impossibilitatis clypeo tegant infida sua subsidia; cùm tamen alligatum parti excrementum opportunè debuissent discutere, si modò tempestivè fuerant accersiti. Transeat hæc errorum cribratio, quam æqui bonique consulere æquum est, non enim scripta fuit nec relicta, ut nos deterreat ab instituto, cùjus specimina Ipse per suos libros passim, locis etiam citatis, exhibuit pulcra: Utut non tam principia Ejus, quàm occasiones & producta morborum subjici queant oculis. Judicium de eo quod fuit, vel non, in potestate artis vel artificis, formabit, quisquis attentè omnes historiarum



circumstantias consideraverit. Quibus ergò missis, illud erat præmittendum, impulsu morborum mentis & corporis, quin tristi cadaverum intuitu, compelli nos cum precibus ad Autorem & Soterem nostrum, ut consilio & auxilio nos & nunc & olim ne destituat, sed conservet; nam via, veritas est & vita!



**V**ocatur Medicus ad Inspectionem Defuncti, sed antè quàm instituat eam inquit in prægressa, & ex ore Parentis consignat Historiam, quæ sequitur: Puer annum agens decimum quartum, sani quidem, minus tamen robusti corporis, sub finem autumnii d. 20. Novembris, subtristis & morosus, à meridie dejicitur, subito expalescens, visus non posse diducere maxillam, gemebundus & de dolore capitis superi antici ad latus dextrum querulus. Die 25. Novembr. etiam à meridie, prima motuum convulsivorum præbet indicia in palpebris & manibus, qui abhinc erumpunt plenius, ingravescent, & indies fortiores è particularibus fiunt universales, frequentes per quinque dies. Post priores paroxysmos solebat asseverare æger, agnovisse se in ipsis adstantes, & observasse motus & torturas sui corporis, in specie labiorum, visus tamen aliquoties subdelirus. Quo diutius interdum emanebant paroxysmi, sive quò longius inter ipsos intervallum, eò sequebatur gravior & longior. Interim extra ipsos non desit Ille conqueri de suâ cephalæâ, constanter in eodem loco designatâ. Sudabat simul usque largiter, sed frigide, solâ facie, nunquam per corpus reliquum, ne quidem à datis lenibus sudoriferis. Aliquoties etiam per istos dies vomuit, quod pomis voluit imputari, quippe quæ, non alia assumpta, rejecisse videbatur, incertis



certis horis. Non destituebatur autem consilio medico, sed externis & internis cephalicis & antispasmodicis tractabatur cum curâ. Die 30. Nov. ad quintam vespertinam accessit paroxysmus omnium gravissimus, sed ultimus, qui duravit per horas quatuor, à quo summè debilis jacuit æger diu, priusquàm se recolligeret tantillum, & verbum profari potuerit. Sic autem extremè languido ipso, paroxysmi tamen convulsivi finem habuerunt, nec recurrerunt amplius ad mortem usque. Notandum verò, die 27. Novembr. primò fuisse observatum externè ad locum illum doloris tumorem quendam, non majorem mediocri nuce juglande, absque inflammatione vicinæ, & vel tandem auditum ex ægro, se nuper ad illud latus fuisse percussum. Emollitus emplastris ille tumor sectione fuit apertus demùm 4. Decembr. & effuso pure pauco, largiore autem cruore, parum subsedit; imò postquam per unum & alterum diem sub deligatione parum fudisset puris, brevi spontè iterum siccatus & occlusus fuit, atque ita imposito cerato betonicæ relictus. Interim varius & mutabilis æger, remittente interdum, sed recrudescente toties, dolore, spem præbebat meliorem, non tamen constantem: Rarò erigi poterat sine deliquiis, eorumve metu vel sensu. Pulsus debilis; Sitis nulla. Die 10. Dec. cùm absque motibus spasmodicis querelæ de dolore manerent eædem, novus jam accessit dolor cervicis, quæ altero mane parùm intumuit, sine rubore. Die 14. Dec. ad cœnam cibum petiit, insolito modo & more devoravit, lectum mutari, & ex hypocausto in cameram deportari voluit; quale quid hætenus non factum. Die 15. summo mane circa quintam, post noctem inquietam, subitò taciturnus, faciem hætenus pallidam exhibuit rubentem, pulsus fortiozem, cùm tamen jace-



ret quietus per diem, usque dum ad quintam vespertinam anhelosè respirare inciperet. Hinc brevi pòst, spiritus ter è profundis tracto, cum spumâ circa os, livescens labiis, exspiravit.

Hujus ergò defuncti inspectio die 17. Decembris phænomena exhibuit sequentia: Caput magnum, mundum, dextro latere rubens magis & livens, tumensque genâ dextrâ, è narium maximè dextrâ cruorem stillans, cum livoribus ad & per dorsum latè protensis, alia externè læsionis signa nulla exhibens, præterquam superstitem adhuc tumorem illum, parvæ castaneæ convexo planæ magnitudine, in apice molliusculum, cætera durior, sanæ cuti concolorem; Qui dissectus dedit tantillum puris, & texturam cutis ad latitudinem dimidii floreni cruore interfuso incrassatam monstravit. Sub hoc abscessu, lato pollice citra futuram coronalem versus frontem dextri lateris, desiderabatur portiuncula cranii, fragmentum inde quasi annulare minimum secessisse oportuit, aderat enim tantilla fossula in cranio, ex cujus margine fibrillæ rubellæ protendi & pericranio jungi videbantur. Nulla tamen ibi caries, nulla rima; nec penetravit illa læsio per laminam cranii interior, hanc enim mansisse integram clarè patuit detractâ ollâ lucique obversâ. De cætero nulla per cranium fractura, fissura, depressio, aliusve signa læsionis; Illud autem notabile, ad futuras sagittalem & lambdoideam cruorem largiter perrupisse, ut juxta tractum ipsarum exterior postica pars capitis ipso fuerit omninò suffusa. Nil tale extravasatum sub cranio, dura mater externo aspectu illibata, sinus autem habebat suos multo sanguine turgidos, quem aperti nigrum fluidum tamen largiter fuderunt. Cùm juxta longitudinem falcis incisione factâ elevandus esset



esset anterior dexter meningis quadrans, & denudandus ille cerebri lobus, adhærebat illa dura meninx tenui, cerebroque, ibi præcisè, ubi extus ille tumor. Non successit ergò separatio meningum, quin erumpere inciperet è summo gutta puris: Quo benè cocto, tantillum luteo-viridescente, non cruento, non fœtido, leniter expresso, ad unius & alterius cochlearis quantitatem, patuit in ipso cerebri lobo insignis cavitas, sub limbo ejus desuper extenuato descendens in ipsam ibi medullam, non tamen ad lateris usque ventriculum, clausa undique per tunicam quasi duplicem, rubellam unam, alteram mucosam; cui vicina pars cerebri nisi quòd mollior aliquantum laudabilis. De cætero nihil ultra vel inflammatum vel suppuratum, ventriculi vacui, nec in ipsis nec ad basin cerebri cruor vel serum. Hinc in medio ventre Cor ferè exsangue: Pulmones cruore turgidi, lividi. Tandem in abdomine Ventriculus magnus, flatu plenus; Nec aliter se habuere Intestina. Hepar pallidum, factis incisionibus vix sanguinem fudit. Plenior tamen adhuc in altero latere suo sanguine Lien. Per reliquum corpus nihil ultrà singulare vel à statu naturali adeò recedere visum.

**D**uo sunt præcipua, quæ per anatomen de hoc casu innotuerunt, duplex abscessus, cruor & pus; Hæc revocari volunt ad suas causas, & conferri cum illis, quæ perpeffus quondam fuit æger per tres in quartam septimanas suæ miseræ. Qualis fortè in vesiculosâ pulmonum substantiâ latet vomica, s. pure concluso scatens folliculus: Quale pus in medio glandulosi hepatis interdum, quin aliis etiam visceribus & partibus occultum, per sectionem demùm deprehenditur, jam olim prolixè descriptum à *Cæl. Aureliano* morb. chron. l. 5. c. 10: Tale quid omninò  
nec



nec ullo modo diffimile in ipso quoque cerebro fuit observatum. Abscessus, non qualem *Arn. Bootius* d. aff. om. c. 1. à sanguine in sinibus longo & lateralibus stagnante in pus converso oriundum proponit causam dolorum capitis; quanquam enim multum ad extrema momenti fuerit situm in sinibus illis cruore oppletis, puris tamen ipsi fuerunt expertes. Nec altera, quam describit *Idem*, c. 2. vomica hypocrania; quanquam enim hanc deducat à violentiâ externâ, & propriam ipsi cystin pure plenam assignet, quod benè convenit, locum tamen non eundem determinavit, sed suam inter cranium & meningem fecus ossa petrosa observavit. Non statim sub cranio, sed ulterius sub utrâque meningum fuit illa nostri, in summo quidem lobi dextri antici, demissa tamen in ipsam cerebri substantiam, atque adeò tertia laudato Autori ipsius cerebri dicta Vomica. Fuit, non Hydatis modò, sive aqua, vel limpidior vel turbida, intra sibi propriam membranam, qualis in brutis & hominibus observata legitur in Sepulchreto *Th. Boneti* à *Sculteto*, *Wepfero*, &c. in *Ephemeridibus Naturæ Curiosorum* D. 3. A. 1. O. 152. schol. à *Brunnero*; sed pure vero & suo sensu bono turgens vomica: Non cum cerebro latius in putrilaginem corrupto, nec cum membranis latè rubentibus aut liventibus, sed malum valdè concentratum intra parvi spatii compendium.

Talem in cerebro vomicam posse oriri à causâ internâ ab occulto principio, sine notâ violentiâ externè illatâ capiti, suadet analogia consimilium per reliquum corpus observatarum, quæ solum cerebrum vix sinunt excipi, & confirmat observationum non una in laudatâ anatome practicâ *Boneti*, quibus sistuntur abscessus cerebri,



bri, absque eo ut fiat ulla mentio prægressiarum quarumcunque injuriarum ; Quibus accedat *J. M. Lancisii* d. mort. sub. l. i. c. i i. hydatis insignis supra cerebrum à suppressâ podagrâ, à mariscis identidem suppressis abscessus polypeus meningum & corticis cerebri. Eadem tamen fide docemur ibi, multas istiusmodi puris generationes in cerebro venisse à causâ externâ : Interdum leves quantumvis creditas capitis contusiones esse lethiferas, saniem intra cuniculos colligi, ex morâ acerriam & planè veneficam indolem nancisci, lentas collectiones tandem repentinè jugulare. Et à tali vi externâ deducendum venit nostri casûs principium. Quamvis enim voluerit dubitari, utrum percussio non magna, instrumentum ipsius non adeò grave aut solidum, ligneum, possit præsumi sufficiens pro læsione interiore & profundâ : Nihilominus sani prius pueri talis correptio, ipsius assertio, internus externo abscessus ita respondens, & similium fatalium exemplorum historiæ in isto sepulcr. in *E. N. C.* item *Schenckii* Obs. & *Bohnii* renunc. vuln. ac medic. for. obviæ, omninò & in hoc casu jubent agnoscere parva magnorum morborum principia ; non solum interna, sed & externa. Salvo itaque cranio, nec depressionem nec fracturam passo, (exceptâ laminæ exterioris portiunculâ, quam abscessu arguebat foveola, quæque accedit testimoniis violentiæ externæ.) non ad festucam sive fragmentum cranii membranæ impactum ortus fuit cerebri abscessus, quod præter quàm locis citatis etiam in *apiar. Harderi* o. 3 i. factum legitur : Sed sub cranio integro & sub durâ in ipsius cerebri piâ meninge vestiti cortice vel gyro quodam solutionem continui quandam utut parvulam factam fuisse oportuit, cum vi, quantâ vel qualicunque demùm, percuteretur Il-



le , fatali utique modo, nam alios percussiones multo violentiores impunè sustinuisse vix dubium est.

Modum fiendi abscessûs ita quondam declaravit *Galenus*. In d. tot. morb. temp. c. 3. quadruplici modo ponit repleri partem sanguinolentâ substantiâ, sive propter coincidentiam sive propter impactionem obstructionemque vasorum, sive ob circumstantiam quandam molium, quæ meatus occupant, sive denique abundantiam sanguinis. Hæc tendunt ad extravasationem portionis quantitate majore vel minore, factam in hoc casu sub vi externâ per rupturam tenuis vasculi, undè profusi & stagnantis imminet mutatio : prout Ille quidem d. inæqual. in temp. c. 3. fluxionem calidam in musculos fieri voluit, dum sanguis non amplius suis vasculis contineri potest, sed partim per ora partim per tunicas colatus foràs transmittitur, & spatia intermedia occupat, implet. Hæc autem fluxio, vel vincit, vel vincitur, pergit *Galenus*. Illud fit ad corruptionem particulæ affectæ, hoc per modum vel discussionis, quod esset maximè optandum, vel concoctionis, quæ duo importat, puris sc. generationem & ejus in aliquod spatium abscissionem. Item diff. febr. l. 1. c. 6: Illud fit superatâ naturâ, hoc autem naturâ superante. Hujus in abscessu & similibus collectioni tumoribus specimen proponit pus ritè coctum, quod hinc porrò comparat cum urinæ sedimento in febribus quæ ex putredine accendantur, nempe pus album & crassum, & quaquaversum sibi simile, lene autem tangenti & minimè foetidum, cum sedimento urinarum albo, leni, æquali, & minimè foetido, additque : Talis quidem putredo non simpliciter putredo existit, sed aliquid in se continet concoctionis; in comparatione scil. ad putrefactionem naturæ superatæ, prout contusio vel levis insensibiliter



sibiliter discutitur, vel gravior suppuratur, aut gravissima gangrænâ corripitur. *Dolei* Encycl. Chirurg. l. i. c. 3.

Prodit sese illa naturæ occupatio per nostrum casum effectum non uno. Ante omnia suppuratio fuit facta quasi ad requisitum *aph.* 44. 45. s. 4. non enim qualis amurca ex tunicâ quâ continebatur profluxit pus illud, sed erat in se adhuc satis bonum; modò cætera fuissent paria. Communis at insignis tamen est hæc mutatio specifica sanguinis, aut partium ipsius chylosarum, gelatinosarum, nutritiarum, siquidem has potius determinare placeat puris materiam. Deindè, tunica illa mucosa & rubella concludens & defendens ut cunque ab injuriâ cerebrum videtur alterum sollicitudinis naturæ specimen, quo novam novo hospiti texturam, telam, domum, nidum quasi condidit, composuit, quin hosti opposuit. Sic hydatidis illa *Brunnero* fuit indicio, humores in ipso cerebro fluentes epidermide posse obduci; Ita *Bootius* vomicæ hypocraniæ originem sibi concipit: Sanguini profuso solers natura tenuia ex ipso fila deproperans, ac undique retis instar circumtendens, iisque alia super aliis interserens, ac obliquis quoque transversisque fibris omnia inter se firmiter atque arctè ligans, eodem artificio quo membrana in utero semini genitali statim à conceptu circumdantur, parvo temporis spatio firmum detexit folliculum, intra quem conclusus cruor paulatim à statu suo demutatur, atque in pus excoquitur. Transeat illud membranarum foëtus exemplum, quod non omnes probaverint: Hoc modò addendum, non fuisse tamen hîc folliculum à cerebro ita separabilem, uti atheroma quasi ovum testâ carens sub cute eximi potest & solet integrum. Actuosam denique naturam declarat quoque membranarum coñexio, turgidioris lobi per summitatem modò vomicæ



cum durâ meninge jam obfirmata cohæſio, ut ſine puris eruptione ſeparari à ſubjectâ tenui non pòtuerit. Ità æpius pulmo alicubi pleuræ, hepar vel & ipſa inteſtina pèritonæo adhæſerunt: bono interdum fato, quod colligas ex obſerv. 50. *Ruyſchii*, & *Plateri* ſub finem libri tertii. Quo in cadavere viſo effectû tanquam ſigno arguitur ex cauſis etiam prægreſſa quondam ibi inflammatarum partium ſuppuratio, conſolidatio, & coaleſcentia. Inflammationem non magnam in noſtro caſu fuiſſe oportuit, quæ febrem clariorem, fortiorem ruliſſet, cum deliriis; occulta, parva, levis colligitur fuiſſe per abſentiam horum ſymptomatum & per fidem inſpectionis præmiſſæ. Externum autem abſceſſum quoque eadem viſ & ſeceſſus oſſeæ portiunculæ intulerat, qui ſerò quidem cognitus, citò nimis iterum clauſus, cum larga exteriorum ſuppuratio conducat periclitantibus interioribus, hoc tamen in caſu parum importaſſe videtur, quando quidem & viciniam inflammationis & calvariam cariei expertem reliquit; ut ut diu præter morem protractus fuerit, nec diſcuſſus; an etiam hæc ex parte propter occupationem internam magis neglectus: ſed ultimo cruoris niſu iterum plenior.

Vomica illa manſit clauſa ad uſque mortem. Aliàs vario fato rumpitur. Quantò magis de eo quod intra cranium fit, verum eſt illud *Jonſtoni* Med. Pract. l. 9. t. 4. c. 3. de vomice intra pectus pulmonum: Ex his æger non convaleſcit, niſi ſuppuratio citò fiat, facta citò erumpat, ad ſuperiora vergat, & per tuſſim ejiciatur, totum pus evacuetur, venter, i. e. cavitas illa, in quâ pus continebatur, perfectè agglutinetur. Inter illas muſculorum & viſcerum abſceſſiones, quarum fata d. inæq. intemp. prout in partes majoris minorisve momenti fiunt ibi proſequitur, *Galenus* earum quoque non oblivſcitur, quæ



circa cerebrum existunt; bona est, scribit, quæ in priores ejus ventriculos abscedit, mala, quæ sub involucri ejus, item quæ in posticum ejus ventrem se recipit. Sive de primâ sede abscessus, sive de effuso pure illa sumas, periculosa plenum opus erit aleæ. Nisi fato, magis optando quàm sperando, ruptâ vomica, contingat felix puri exitus aut resorptio, cedit illa diffusio in novum cerebri & membranarum præjudicium. Quis tamen non stupeat, *Boottii* ægrum, pilâ niveâ ad latus dolens capitis percussum, fuso per aures pure, fuisse liberatum; siquidem illud venit ab intimis. Quia ut dictum nostri thematis vomica rupturam non fuit experta, quare non est, quod prosequamur istiusmodi per nares & aures solutos cerebri abscessus. Videtis præter citatos Autores Ill. N. C. Præf. *Schræckium* in schol. o. 10. A. 6. D. 2. Indicari tamen etiam ineretur & legi cum commentario *Vallesii* historia Virginis recensita ab *Hippocrate* in epidem. l. 5. §. 47. cui ab amicâ ludente latâ manu percussæ secundum synciput, statim vertiginosæ, indè febricitanti, dolenti, (& rubra circa faciem erat) die septimâ per aurem dextram pus exiit, foetidum, subrubrum, plus cyathos & videbatur melius habere, & sublevata est. Sed intensâ rursus febre, cum sopore, aphoniâ, convulsione, dyspnoeâ, oculi stupore correpta, nonâ fuit mortua. Fatum triste, simile, acutius, abscessus potius cruenti, inflammatorii, quàm descriptæ hætenus vomicæ.

Quod ita malè cedit, vel Natura non præstat, utrum supplere poterit Ars, procurando puri exitum? An trepani ope perveniri ad subjectum locum affectum, & urgente cerebro extrudi pus è suo carcere. Pro eo, quod super duram sub cranio fluit aut jacet cruoris aut puris evocando adæquatum videtur in illâ operatione remedium.



dium. At quid sperandum de eo, quod non ibi sed infrà, sub integrâ adhuc membranâ latet; si vel maximè contingat, quod non æquè certum, præcisè ad summum vomicæ perforari cranium. Suppetit nobis aliundè historia talis, fide digna, viri sexagenarii, qui dolore syncipitis dextri constanter sic vexatus, ut caput attollere aut erectum tenere non potuerit, cubans tamen aliquanto minus malè se habuerit, nec oculos movere potis, trepanationem utcunque feliciter sustinuisse visus, quippe oculos iterum attollere poterat unâ post operationem horâ, & edebat parum levatus, sub curatione chirurgicâ diligentî, tertio tamen die dicitur obiisse apoplecticus. Quemadmodùm per foramen cranii nullus nec cruoris nec puris fuerat factus effluxus, comparente per illud membranâ distentâ & turgidâ, sic in cadavere directè infra illud foramen repertum fuit pus, etiam in ipsâ cerebri substantiâ, quantitate magni cochlearis. Quibus ita se habentibus, quid obstat, quo minus repetamus verba *Volch. Coiteri* ex obs. anat. & chir: Periculosiora penes me sunt cranii vulnera, in quibus integrâ durâ, cerebrum læsum est, vel ubi sub durâ membranâ læsa veña vel arteria (quod levi de causâ contingit) sanguinem effudit, quàm cum membrana simul sit vulnerata. Siquidem horum plures atq; illorum vidi curatos. Nam membrana dura ob suam densitatem atque crassitiem nec sanguinem emissum, nec pus sub eâ generatum emittere potest. Hâc de causâ nisi reprehensionem & calumnias metuerem, in gravibus & periculosis capitis vulneribus, ubi vel contusionis cerebri vel perrupti vasis sub membranâ manifesta haberem signa, auderem hanc duram cerebri membranam perscindere. Audaciores in hoc sunt recentiores, quippe faciles in præcipiendâ incisione; sed quo cum successu, historiis



riis curatarum ita vomicarum foret demonstrandum.

Quàm præstaret ergò præcavere talem vomicam in fieri, modò semper possibile sit dissipari & resorberi, quod effunditur, priusquàm fiat illa puris generatio & collectio. Nonnihil sperare jubet analogia quorundã ex apoplecticis evadentium: Cavernulas & cicatrices callosas in cerebro ante quinq; annos apoplecticæ vidit *Brunnerus*, hinc factas ibi solutiones continui consolidari posse interdum & digeri sanguinem extravasatum probavit, in *E. N. C.* 3. 1. 154. Manet tamen vomica malum anceps, tam semioticè quàm therapevticè: Ubi & causa videtur non tanti, & effectus veniunt serò & dubiè. Caveant medici prædicere, se deprehensuros aliquid in capite eorum, qui morbo cerebri interierint. Nescio, quî fiat, ut morborum cerebri & notitia & curatio sit difficilima. Sic cum *Ballonio Bonetus* & *Lancisius*. Quo magis opus est, talium casuum (quò plurium, eò melius) observari & colligi phænomena, pro eruendâ & dignoscendâ latente vomicâ. Non minus absentia quorundam, quàm præsentia aliorum, phænomenorum rem declarabit. Quàm occultè procedit vomica pulmonis? Omnes aliarum partium suppurationes manifestantur per rigorem & febrim supervenientem; sola pulmonum suppuratio, id est vomica eorundem, clanculum & sine prædictis signis supervenit. *Bagliv.* Prax. med. 1. 1. c. 13. Confer. quæ *Heurnius* ad aph. 41. f. 6: Quibus pus in corpore nullam de se notam præbet, ob sui crassitudinem, aut loci, non se prodit. Generalia igitur contusio-num & concussionum capitis præsidia & citò & diligenter usurpanda erunt, nunquam illæ parvi pendendæ, applicandum potius proverbium, de superfluis non nocentibus. Quæ specialius in casu ruptorum sub cranio integro vasculorum tentari possint & debeant, in compendio



dio exhibet *H. Boerhaven* aph. 279. & seqq. latius deducta *Dolans* in laud. encycl. chir. quibus jung. indicationes congestionis & suppurationis occultæ, lentæ, apud *Lancis*. l. i. c. 23. & chirurgicarum observ. ac curationum passim Scriptores benè multos. Quàm facilè autem fit, talia negligi, dum in principio læsionem tanti æger cum suis non æstimat, & meliora deum sedet omina poscens.

Inventa fuit illa vomica in cadavere adolescentis, dolorem capitis certo loco fixum perpeffi ad quartam denique septimanam funestum. Hoc est, quod legitur in *sep. Boneti* ab obs. 40. ad 60. modis omninò multis & variis factum: etiam cum dolore capitis partè quâ non fuit abscessus, o. 50. Consimiles historiæ accedunt hinc inde, e. g. ex *Journal d. savans* ann. 97. p. 549. *E. N. C.* 2. 3. o. 74. & 3. 3. o. 166, ubi ab apoplexiâ liberatus, sed hemicraniâ correptus, post mortem in partè affectâ exhibuit abscessum durâ involutum membranâ. Sic præter cranii cariæ & exostosi, præter cerebri cruda quasi tubercula, quin lapides & vermes, atque similia rara mala, inter causas cephalææ acutioris, constantioris, intimioris fixas & occultas etiam est vomica; ut priores tamen per se ad chronicam passionem videantur se extendere longius. Nihilominus admirationi est, quamdiu etiam passi fuerint, quorum abscessus cerebri ad ovi columbini, anserini magnitudinem, cum tantâ puris acrimoniâ, ut cranium corroderit, leguntur locis modò citatis. Equidem actus ille naturæ circa solutionem continui occupatus non fit absque intensione partis & vicinæ; tumor augmenta sumens & turgidior cerebri limbus jugem fibrillis distractionem ac divulsionem intentat. An & puris acrimonia hîc rodendo irritavit? quâ pertigit ad succingentem anfractus piam meningem. Mucosus enim folliculus & cerebrum



rebrum ipsum exquisito sensu doluisse non videtur. *Helmontij* archeus vel spiritus insitus naturalem habet aversionem ab objecto dolente, undè dolor perpetim quasi comitem habet sui membri crispationem. Ubi autem stabilis est in parte dolor, prout in apostemate, ibi ex solâ merâque indignatione æstuat ille. d. lith. c. 9. Etenim tumor & dolor est à spiritu causaliter, ab infixâ spinâ, verâ vel metaphoricâ, occasionaliter; in pus autem degenerat sextæ digestionis mucilago sive proximum solidarum alimentû. *Wepferus* apopl. hist. xvi. cùm in cadavere juvenis duram matrem tenui meningi fere dimidii dahleri amplitudine præter naturam intermediis fibris validissimis accretam observasset, ob hanc, scripsit, concretionem, sævam procul dubio diu cephalalgiam sustinuit. Et *Willis*. d. anat. cer. c. 9: defunctorum capita, qui dum in vivis agerent cephalalgia miserrimæ erant obnoxii, aliquoties aperui, in quibus juxta sinum longitudinalem, ubi dolorum sedes erat, interior meninx exteriori per aliquod spatium accreverat; hoc enim ipso fuisse positum impedimentum circulationi sanguinis.

Fuit dolor cum motibus convulsivis. Quod fortè ratio minus miretur, quàm dolorem istiusmodi sine spasmo, & spasmus vicissim sine dolore. Fundamentum istorum motuum p. n. concussoriorum est in communione & viciniâ membranarû cerebri, in hujus tanquam partis maximè nobilis passione & periculo: Præstò est objectum peregrinum, insolitum, noxium; Quidnî fieret occasio turbarum, commotionum & conatuum excussoriorum. Frustrà tamen, quæcunque vel ratio suaserit, aut vis extorserit. Nisus ille vibratorius systematis nervosi & convulsæ musculosarum fibrarum copiae gravius modò perturbarunt afflictam jam dum œconomiam corporis. Durarunt autem motus convulsivi per quinque modò dies,



non redierunt per quindecim posteriores vitæ dies, præ-  
 sente five mansisse visâ causâ occasionali. Utrum ex tribus  
 Hippocraticis dabit rationem: continens an contentum,  
 vel impetum faciens? Hoc post conatus vanos, malos, in-  
 primis fortem ultimum, an destitit ab actibus supervaca-  
 neis? Aut, fuitné minus sollicitatum ab illo pure, minus  
 corrosivo, ac aliorum historiæ docent, concluso intra il-  
 lum spissiore folliculum mucosum, ut nec plenâ liber-  
 tate versus membranas nec ad principia nervorum per-  
 tingeret. Licetne applicare *aph.* 47. f. 2: Dum pus fit, do-  
 lores & febres (hîc spasmi) accidunt magis, quàm confe-  
 cto. Phænomenon autem istud, de corpore sc. per omnes  
 partes variè læso & graviter dolentē, nec convulso ta-  
 men, exemplis multis & miris illustratum, videsis à *B. Pa-  
 rente Præsidis* in disp. de epilepsiæ frequentia, & à *Wepfe-  
 ro* in cic. aq. à pag. 100. ad 106. ubi ad diversa objecta va-  
 rius, utut laceffit, non semper tamen tumultuabundus;  
 Nervosi Generis Præses ex professo. Sc. jugiter obversans  
 objectum adversum & noxium non æquè tamen jugi mo-  
 tu observatur impetere, sed sæpè agi & agere per inter-  
 valla. In hoc casu, eò insurrexit fortius post horas, quò  
 diutius quieverat. Amplum cerebri vulnus sub directio-  
 ne *Exc. Dn. D. Zelleri*, Agnati & Patroni summè veneran-  
 di, curatum, non solebat ferre spasmorum prodromos,  
 nisi cùm largiter suppurans non frequenter deligabatur,  
 illi enim toties emissio tempestivè pure præcaveri pote-  
 rant. *Baglivus* d. fibr. motr. animadv. 3. à vulneribus ca-  
 pitis interdum substantiam cerebri putridam sanieque  
 plenam observavit, cùm tamen æger nulla pateretur ac-  
 cidentia lethargi, delirii, convulsionum. Rationem sub-  
 jungit paucis: Meninges n. minimè fuerant graviter tenta-  
 tæ. Secus, ubi fuerint inflàmata, sanie interspersæ. Miratùr  
 in *E. N. C.* 3. 3. o. 168. *Schelhammerus*, in iisdem 3. 4. o. 54. *S.*



*Grassius*, magnum capitis vulnus, gravissimam cerebri læsionem, sine gravibus symptomatibus. *Diemerbræck*. anat. l. 3. c. 5. & 10. proponit bina cerebri apostemata benè ampliora, in argumentum dubiæ prorsus in cerebro sedis facultatum animæ, quandoquidem potiores harum operationes perstiterunt in salvo, dum adeò recederet à suo statu naturali cerebrum. Ut in comparatione talium de minore & clausâ vomica non sit, quòd plura dicamus.

Interim sudor, nunquam corporis, sed faciei solius, multus, at frigidus. Qualis passim malè audit, e. g. *aph.* 4. s. 8. 37. 42. s. 4. quibus adde intermedium 38. s. 4: Quâ corporis parte sudor, ibi morbus. Quem commentator *Heurnius* facultatis infirmitati vel crudæ materiæ contumaciæ imputat. Excerptis plures ex scriptis *Cob Bicaifius* in manuali, qui huc tendunt: Sudores frigidos, tenues, qui milii formam referunt, circa caput duntaxat & cervicem, esse malos, denunciare diuturnitatem vel periculum. Doluit ergò cum sudore frigido & pallore caput, quia centrum motuum erat in superioribus & interioribus: Deliquia verò, hîc non ab eruptione tuberculi ex *aph.* 8. s. 7. sed à situ erecto, modumne syncopiticum an convulsiones designant internas? Huc spectant duo aphorismi, unus *Vallesianus Petri à Castro* l. 5. n. 355: Sudor his fieri solet, qui convelluntur ob anxietatem, quam difficilis motus musculorum facit; alter *Sanctorianus M. Listeri* s. 1. nr. 22: Frigidis sudoribus, ubi vis cordis languet, perspiratio fit visibilis, scil. ex resolutione ductuum excretoriorum.

Venit quinto ante obitum die novus cervicis dolor & tumor. Hic in capite vulneratis aliàs observatur & prætenditur à *Marchetto* signum delabentis materiæ ad ventrem medium & infimum, unde pulmonum & hepatis oriundi abscessus. *Bohn.* renunc. vuln. p. 117. *Lancis.* l. 1. c. 20. Non laboravit hepar vel pulmo abscessu, sed hic cruore tumidus & lividus movit admirationem, quî fuerit intra breve tempus ita oppletus, vel si citius id factum, quòd difficultatem spirandi majorem non tulerit prius, quàm ad ultimam vesperam. Hinc etiam non fuit hîc metastasis, sed epigenesis. Juxta *Lindannum* ex. sel. 6. §. 24. 7. §. 13. Vomica manenti, quin spatium requirendo & ocupando majus urgenti & prementi, necdum tamen simpliciter funestæ, accessit alter hostis & morbus, cruoris infarctus. Quæ occasio accessionis? Cùm non constet de causâ ex-



ternâ. Sive, quæ necessitas superveniendi, hoc est, pellendi vel detinendi cruoris? Nisi adversus obstaculum, offendiculum, nuper spasmodum jam multi sanguinis motu, visum fuit esse pugnandum. In aph. nov. 7. Sponii l. 3. nr. 18. cervicis dolores, oculi prærubri, hæmorrhagiam narium prænunciant. Id namque sanguinis impetum ad superiora testatur. Confirmatus fuit ille aphorismus demum per mortem. Interim conatus hic alter & alius evacuatorius, excussorius, quem prodidit etiam rubens vultus, & fortior pulsus, pariter cessit in vanum, imò in pejus. Pallens enim subtus jecur, latus desuper capitis dextrum à morte tumidius, livens, stillans, κατ' ἐξιν, accumulati sanguinis copiam & vim arguunt tantam, ut cruentaret futuras. Per quas & nares quia tenerior ætas concessit exitum, intra cerebrum non comparuit extravasatus. Sic dolor ille cervicis circa terminum morborum simpliciter acutorum, scil. diem vigesimum, fuit novæ mutationis principium, intra quartam tamen adhuc septimanam fataliter terminandæ, modo non tam purulento quàm cruento. Sic mors non immediatè à vomica, sed à cruore in caput & pulmones coacto, detento. Ibi fuerunt congestiones novæ, cor autem deprehendebatur ferè vacuum. Spuma ante os & livores dorsi utrique respondent infarctui. Equidem post ultimam illam perturbationem mentis, inter pus & cruorem quasi constitutæ, sive impressionibus utriusque subjectæ, quam prodidit vorare illud & migrare, post ultimam noctis inquietudinem obticescens æger jacuisse videtur modo quodam attonito per diem apoplectico similis: Nec vultus, nec pulsus repugnant. Donec serus vesper ferret mutationum ultimam, finem miseriæ imposeret. Fuerunt utique exacerbationum tempora per morbum pomeridiana, vespertina; Sive quòd soleant aliàs etiam esse hæc suppuratorum, sive quòd declinans cum anni vesperâ in suis per dierum vespertas motibus responderit naturâ. Certè in omnibus suppurationibus ad noctem labores, dixit Hipp. l. 5. epid. §. 73. Et hîc ad finem quoq; declinat Disputatio, triste infaustorum casuum specimen, quorum multitudini & varietati obnoxia brevis mortalium ætas vel in crudâ interdum pueritiâ præpropere abripitur fato. Quo magis æquum est & necesse, ut commendemus jugiter fragile corpusculum ad usque suum terminum divinæ custodiæ, demus & dicamus, quòd adhuc valemus, Deo gratias & gloriam!